


**UBUTUMWA BUGENEWE ABAKRISTU KU  
MUNSI MUKURU W'ABALAYIKI**

**Tariki ya 10 Kamena 2018**

**NIMUBE UMWE NK'UKO JYE NA DATA TURI UMWE (Yh 17,21)**



**UMUNSI MUKURU WA KAROLI LWANGA NA BAGENZI BE**

**Amasomo : (2Mak 7,1-2.9-14; Rm 8,31b-39 ; Yh 12,24-26)**

## Intangiriro

Bakristu bavandimwe, uyu muni mukuru w'abalayiki ubaye mu gihe muri Kiliziya y'u Rwanda, turi mu mwaka wihariye wo kuzirikana ku bwiye bw'abanyarwanda. Uyu muni w'abalayiki kandi uhuriranye n'umuni mukuru w'Abahowe Imana b'i Buganda. Turazirikana ukuntu bunze ubumwe na Kristu ku buryo bukomeye maze bikabatera ubutwari, kugeza n'ubwo bemera gupfa aho kumwihakana. Karoli Lwanga na bagenzi be, n'ubwo bari bakiri abakristu bashya bari bunze ubumwe n'Imana ku buryo buhamye, kandi bunze ubumwe hagati yabo ubwabo, bagaterana ubutwari, bagashyigikirana, ntihagira utatira ukwemera kwe. Ubuhamya bwabo butubere urugero natwe.

Ni nabyo twumvise mu isomo rya mbere, aho batubwiye ukuntu ukwemera gukomeye k'umubyeyi kwatumye atoza abana be kumvira Imana kuruta byose, bigeza n'aho bemera guhara ubuzima bwabo, aho gukora ibinyuranye n'ukwemera kwabo. Mu rwandiko Abepiskopi bacu batwandikiye muri uyu mwaka w'ubwiye, baradushishikariza kwiyunga n'Imana, kwiyunga natwe ubwacu, kwiyunga n'abandi, ndetse no kwiyunga n'ibidukikije.

### 1. Kwiyunga n'Imana

Kwiyunga n'Imana niryo shingiro ry'ubwiye nyabwo. icyaha ni cyo nyirabayazana mu macakubiri tubamo, yatumye mu Rwanda habamo akarengane gashingiye ku ivangura, ihezwa, ikandamizwa, ubwicanyi, intambara, ubuhunzi n'ubugome bukabije bigera no kuri jenocide yakorewe abatutsi mu mwaka w'1994. Ariko tuzi ko ubwo muntu yari amaze gucumura, Imana itamutereranye; ahubwo yatwoherereza Umwana wayo, kugira ngo adusubize agaciro twiyambuye ducumura. Imana yakunze isi cyane bigeza aho itanga Umwana wayo w'ikinege (Yh 3,16).

Uwo Mwana w'Imana yaduhuriye mu muryango umwe, aca urwango rwadutandukanyaga, n'ubu rudutandukanya n'abavandimwe. Turasabwa rero natwe, kugarukira Imana tukiyunga na Yo nk'uko Pawulo Mutagatifu abidushishikariza muri aya magambo : «*Uko biri kose Imana ni Yo yiyunze n'abantu bose muri Kristu, ntiyaba ikibabaraho ibicumuro byabo, natwe idushinga ubutumwa bwo kubungira na Yo* ».

Mu rwandiko rw'Abepiskopi baragira bati : Ubwiye ni inzira ndende isaba igihe, ubushishozi n'ubusabanirama. Turifuza ko intambwe ishimishije y'ubwiye tumaze gutera twayikomeza : twiyunga n'Imana, twiyunga na twe ubwacu, tukiyunga n'abavandimwe bacu ndetse n'ibidukikije nk'uko Papa Fransisco yabidusabye<sup>1</sup>.

### 2. Kwiyunga natwe ubwacu

Umutima w'umuntu ubamo ibitekerezo bivuguruzanya. Umuntu wese akunda amahoro ariko hakaba n'ubwo ayibuza. Ibiyuza abantu amahoro ni byinshi kandi bimwe muri byo bituruka mu mutima wabo. Mu Ivanjiri, Yezu abivuga muri aya magambo : «*Kuko mu mutima w'abantu ari ho haturuka imigambi mibi : ubusambo, ubujura, ubwicanyi, ubuhabara, umururumba, ubugome, uburyarya, ingeso mbi, ishyari, gutukana, ubwirasi, n'amafuti. Ibyo bintu byose bibi biva mu mutima ni byo bihumanya umuntu* » (Mk 7,22-23).

---

<sup>1</sup> Reba Kristu ni We bumwe bwacu n° 2.



kinyejana cya makumyabiri, usanga hari igihe kinini hagaragayemo urukundo ruke n'akarengane gakabije katugejeje ku mahano yo mu mwaka w'1994.

Koko rero, Jenocide yakorewe abatutsi mu Rwanda, yabaye umunzani wapimye ikigero cy'ubumuntu n'icy'ubukristu buke mu banyarwanda. Hari benshi bijanditse muri icyo cyaha ndengakamere, hari n'abareberaga ntibagire icyo bakora ngo barwanye ako karengane. Ubuzima bw'umuntu bwateshejwe agaciro bigera n'aho kwica umuntu bihabwa intebe<sup>3</sup>.

Uyu mwaka usanze hari byinshi byakozwe mu rwego rwa Kiliziya no ku rwego rw'igihugu, ku buryo bikwiye gushimwa. Bityo rero, na buri mukristu akaba asabwa kugira uruhare nyarwo, mu kubaka ubwiyunge kugira ngo umuryango nyarwanda uce ukubiri n'ibiwusenyanya byose.

#### **4. Kwiyunga n'ibidukikije**

Mbere yo kurema muntu, Imana yabanje kumuremera ibimukikije, izuba, ukwezi n'inyenyeri, amazi n'ubutaka, inyamaswa, ibimera, imutegurira isi nziza azabamo, imuha ubutumwa bwo kubigenga (reba Intg 1,1-28). Icyaha cya Adamu na Eva nicyo cyatumye isi iba mbi, umubano w'umuntu n'ibindi biremwa bizamo igitotsi (reba Intg 3,1-19). Nk'uko mubizi, mu ntambara zabaye no mu gihe cya jenocide yakorewe abatutsi, abantu bigabije abandi barabica, barabahotera, inzu zirasenywa, izindi ziratwikwa, amatungo aricwa, inzuzi n'ibihuru byuzura imirambo, ubutaka bunywa amaraso y'abantu, ibikoresho by'imirimu isanzwe bihinduka ibikoresho byo kwica. Ubwiyunge rero ni ukugarura ubumwe mu bantu no mu biremwa by'Imana byose<sup>4</sup>.

Abepiskopi bacu baradushishikariza kwiyunga n'ibidukikije, dufata neza ibyo tumaze kugeraho, ari inyubako, ari ibimera nk'amashyamba, ari amazi, imihanda, n'ibindi..; kuko ari byo bituma tumererwa neza, tukabana neza mu bumwe no mu mahoro arambye.

#### **5. Umwanzuro**

Bakristu bavandimwe, Yezu ajya gusoza ubutumwa yahawe na Se kuri iyi si, yaturaze ubumwe agira, ati: *"Nk'uko Wowe Dawe uri muri Jye nanjye nkaba muri Wowe, ndasaba ko na bo bunga ubumwe muri twe, kugira ngo isi yemere ko ari Wowe wantumye"*(Yh 17,21). Uwo murage ntituzawiteshe, tuwuharanire, kuko turi abana b'umubyeyi umwe. Twiyemeze kuwukomeraho mu buzima bwacu no mu bikorwa byacu, kuko ubumwe bwacu ari nazo mbaraga zacu.

Tubaragije Umubyeyi Bikira Mariya, Umwamikazi wa Kibeho; adufashe guharanira ubumwe n'ubwiyunge ari nabyo bizatubyarira ubuvandimwe nyabwo.

Imana ibahe mwese umugisha.

**+ Mgr Serviliyani NZAKAMWITA**  
**Umwepiskopi wa Byumba akaba na**  
**Perezida wa Komisiyo y'Abepiskopi ishinze ubutumwa bw'abalayiki**

---

<sup>3</sup> Kristu ni We bumwe bwacu n° 3.

<sup>4</sup> Kristu ni We bumwe bwacu no 20.